

OHR poziva na brzo uklanjanje prepreka za investiranje u BiH

Kvalitetno provedeni proces investiranja, koji će postati moguć onda kada političari započnu sa provođenjem teških ali neophodnih ekonomskih reformi, bi mogao osigurati prosperitet u roku od pet do deset godina, izjavio je zamjenik Visokog predstavnika i šef Ekonomskog odjela OHR-a, gospodin Patrice Dreiski, na dvodnevnoj regionalnoj konferenciji o investicijama koja je danas počela u Sarajevu. Tokom konferencije, sudionicima su se danas obratili i predsjedavajući Predsjedništva BiH, Beriz Belkić, predsjedavajući Vijeća ministara BiH, Dragan Mikerević i ministrica vanjske trgovine i ekonomskih odnosa, Azra Hadžiahmetović.

Gospodin Dreiski je naveo da Bosna i Hercegovina ima obrazovanu radnu snagu, dobar geografski položaj između Evropske Unije i ostalog dijela jugoistočne Evrope, ekonomiju koja se razvija i koja je u velikoj mjeri prekinula svoju ovisnost o teškoj industriji, stabilnu valutu, nisku inflaciju i efikasan i profitabilan bankarski sektor. BiH je privlačna lokacija za investicije, međutim investitori i dalje oklijevaju. Gospodin Dreiski je ustvrdio da je uzrok za ovakvu situaciju nepostojanje tržišne transparentnosti, birkoracija koja nije u mogućnosti da odgovori na zahtjeve tržišta, zastarjeli sistem obrazovanja i rasprostranjena korupcija i kriminal.

“Nepotrebne prepreke investicijama do kojih uglavnom dolazi zbog nekompetentnosti na strani političara ili birokrata onemogućuju ovu potencijalno bogatu zemlju da postane bogata” rekao je gospodin Dreiski. Obećao je da će međunarodna

zajednica pružiti podršku mjerama koje su Vlade dva entiteta i Države već dogovorile poduzeti kako bi uklonile prepreke koje stoje na putu ulaganjima.

On je napomenuo sudionike da je Visoki predstavnik Paddy Ashdown svoje prioritete u BiH rezimirao kao "prvo zakonitost, zatim zapošljavanje, putem reformi". Gospodin Dreiski je rekao da će se za građane BiH zakonitost osigurati putem reforme sudskog sistema. Ovom reformom će se takođe osigurati da moderni trgovinski zakoni koji moraju proći kroz entitetske i državne Parlamente budu propisno provedeni, promovirajući transparentno poslovno okruženje u kojem nova preduzeća mogu otvoriti nova radna mjesta.

On je naveo da su neodržive unutrašnje prepreke trgovini i ulaganju, kao što je apsurdan sistem zbog kojeg se jedno preduzeće koje radi u oba entiteta prilikom plaćanja poreza tretira kao dva odvojena preduzeća i plaća različite poreske stope u svakom od entiteta. On je rekao da se zbog uspješnih mjera poduzetih na ukidanju paralelnih struktura i usklađivanju strateških zakona sada može reći da su propala nastojanja nacionalista da uspostave dva zasebna ekonomska područja umjesto jedinstvenog ekonomskog prostora u BiH.

Navodeći primjere novog pragmatizma u privlačenju stranih investicija, gospodin Dreiski je istakao sistem koji se sada uspostavlja na cijeloj teritoriji BiH koji će radikalno smanjiti vrijeme i dokumentaciju koja je potrebna da bi se u BiH registriralo novo preduzeće. On je takođe pomenuo sveobuhvatnu bazu podataka koju uspostavlja Agencija za promoviranje stranih investicija kako bi se spojili sa budućim stranim investitorima u BiH i razmijenili podatke o mogućnostima za ulaganje.

"Potrebno je brzo djelovati", rekao je gospodin Dreiski. "Razumna i brza reforma će pomoći u otvaranju novih radnih mjesta i uvesti nas u eru prosperiteta. Zašto bi građani BiH trebali čekati?"